



РАҲМАТНОМА

Ички ишлар вазирни В. Камоловга ССЖИ номини К. Саидовдан мактуб келди. Унда ички ишлар ходимлари шаънига яқин гаплар айтилган. Унинг мазмунини тўлиқ келтирамиз.

Ҳурматли Вячеслав Мухторович!

Маълумки кейинги пайтларда мамлакатимизда ҳар хил жиноятларнинг сони кўпайиб бормоқда. Ички ишлар ходимларидан жиноятларнинг олдини олиш, уларни очиш, турли тадбирларни тез ва ўз вақтида ўтказишдек муҳим вазифаларни бажариш талаб қилинмоқда. Кўп ҳолларда ички ишлар ходимлари вазифаларини виждонан бажариб, ўта хавфли жиноятларнинг олдини олишмоқда.

Менга Самарқанд вилоятининг Оқтош шаҳрида яшовчи Б. Омонова мурожаат қилди. У номаълум шахслар томонидан дўқ-пўписали хат олган. Унда агарда 10.000 сўм пулни белгиланган жойга қўймаса, иккита кичик ўғлини ўғирлаб, шахсий енгил автомашинаси ва уйини ёқиб юборишлари билдирилган. Б. Омонова эса дарҳол Нарпай тумани ИИБга бу ҳақда хабар берган. ИИБ ходимларининг оператив ҳаракатлари туфайли жиноятчилар қўлга олинган. Б. Омонова уларнинг бу олийжаноб хизматларидан юқори ташкилотларни хабардор этишимни ва уларга ташаккурнома билдиришларини илтимос қилишимни сўраган.

Ҳақиқатдан ҳам Нарпай тумани ИИБ бошлиғи милиция подполковниги Х. Қодировнинг ҳар бир вазиятни ҳисобга олиб, тадбиркорлик билан иш олиб боргани боис 18 майдан 19 майга ўтар кечаси соат 02.30 да жиноятчилар қўлга олинди. Бу жиноятчилар гуруҳининг аввал ҳам шунга ўхшаш кўп жиноятлар содир этгани маълум бўлди.

Бошлиқ ўринбосари милиция капитани А. Бобоқулов раҳбарлик қилган гуруҳ кучли ёмғир ёришига қарамай жиноятчиларни зарарсизлантириш тадбирини муваффақиятли амалга оширди.

Ҳурматли Вячеслав Мухторович!

Сиз раҳбарлик қилаётган ички ишлар идораларининг ана шундай ўз ишига моҳир, пухта, тадбиркор ходимлари бор экан, сайловчиларим илтимосига кўра уларга миннатдорчилигимни билдириб, раҳматнома йўлламоқдаман.

Сиздан ушбу операцияда қатнашган милиция ходимларини вазирлик томонидан ҳам тақдирлашингизни сўрайман.

Сизга ҳурмат билан 107-Каттақўрғон миллий-худудий мавзесидан ССЖИ халқ номини
К. САИДОВ.

РОДИНА-МАТЬ ЗОВЕТ! ВАТАН УЧУН!



Бундан 50 йил муқаддам худди шу тонгда
Улуғ Ватан уруши бошланган эди

ЎЗБЕКИСТОН СОВЕТ СОЦИАЛИСТИК РЕСПУБЛИКАСИ ПРЕЗИДЕНТИНИНГ ФАРМОНИ

ДИНИЙ БАЙРАМ «ҚУРБОН ҲАЙИТ»НИ ДАМ ОЛИШ КУНИ ДЕБ ЭЪЛОН ҚИЛИШ ҲАҚИДА

Мусулмонларнинг кўплаб истак ва хоҳишларини қондириш ва Урта Осиё мусулмонлари диний бошқармасининг мурожаатини эътиборга олиб ҳамда фуқаролар ҳамжиҳатлиги ва меҳр-оқибатини юксалтириш мақсадида «Қурбон ҳайит» («Ийд ал-адҳа»)ни бу йил 22 июнь куни ва кейинги йилларда эса «Қурбон ҳайит»нинг биринчи куни дам олиш куни деб тайинлансин.

Ўзбекистон Совет
Социалистик Республикаси
Президенти

И. КАРИМОВ.

Тошкент шаҳри,
1991 йил 20 июнь.

КЕНГАШЛИ ТҮЙ ТАРҚАМАС

2 мингдан ортиқ қариялар йиғилган ушбу учрашувни Паркент масжиди имом-хатиби Обиджон Мамажонов кириш сўзи билан очди. Ўз сўзида бугунги мулоқотдан асосий мақсад кексалар маслаҳатини олиш, уларнинг ният ва истакларини, фикр-мулоҳазаларини билишдан иборат эканлигини таъкидлади.

Унда туман фирқа қўмитасининг котиби А. Сатторов, туман прокурори К. Ганибоев, халқ судининг раиси А. Абдуқодиров, ижроқўм раисининг ўринбосари Қ. Эшматов, Паркент шаҳар Кенгаши раиси С. Тўйчиев, «Паркент тонги» рўзномасининг муҳаррири М. Тоиров, ИИБ бошлиғининг ўринбосари Т. Норбоев, матлубот жамияти ҳамда маориф бўлими вакил-

лари қатнашдилар. Бу ерга тўпланган отахонлар ўзларининг таклифларини билдиришиб, кўплаб саволлар ҳам бердилар. Улар жиноятчиликка қарши курашда, жамоат тартибини сақлашда милициянинг ролини ошириш кераклигини, ИИБ биносини эски жойига кўчириш зарурлигини, ишсизларни иш билан таъминлаш лозимлигини айтиб ўтдилар.

Айниқса, тўй тарафидида юрганлар камёб молларни тополмай қийналаётгани ва бу буюмлар чайқовчи қўлида ётгани ҳақидаги саволларни ўриштирилди.

Мирқарим
МИРСОВУРОВ,
ички хизмат майори.

САВДОДАГИ ҒАВҒОЛАР

Ҳаяжон ва ҳадик билан узоқ кутганимиз — бозор муносабатлари ниҳоят ҳаётимизга кириб келиб, бир қатор муаммолар ўткирлиги яққол сезилиб қолди. Биринчидан, турли хил буюм ва маҳсулотлар нархи осмонда бўлса, иккинчидан, савдо тармоқларидан ўша нарсаларнинг ўзини топиш мушкул бўлапти.

Қолаверса, баъзи бир савдо ходимлари шундоқ ҳам зўрға кун қўраётган ҳамюртларимиз ризқини қийиб, бойлик орттириш пайига тушиб қолишган. Ноёб молларни яшириб қўйиш ва қулай пайт топиб, бир неча баробар қимматига пуллаш уларнинг иш услубига айланган.

Яқинда туман халқ назорати қўмитаси ва ИИБ БХСС ходимлари ҳамкорликда текшириш ўтказдилар. Юқориди айтганимиздек, кўплаб дўконларда савдо қоидалари қўпол равишда бузилаётганлиги аниқланди.

Хива тумани матлубот жамиятлари иттифоқига қарашли 28-дўкон сотувчиси Эргаш Худойберганов харидорнинг 5 сўм 50 тийин ҳақини ўриб қолди. Хива шаҳри матлубот жамиятлари иттифоқига қарашли 8-хўжалик моллари дўкони сотувчиси Ҳасанбой Отамуродовнинг турмуш ўртоғи Амина Отажонова харидорнинг 11 сўм 16 тийин ҳақини иккиланмасдан ўзлаштириб юборди.



Хива туманидаги умумий овқатланиш корхонасига қарашли «Баҳор» кафеси ошпази Арслон Сатторовнинг ҳам нафиси ўпқон экан. У мижозлардан бирининг 32 сўм 90 тийин ҳақини тухум ютгандек гумдон қилмоқчи бўлди-ю, лекин иложи бўлмади. Улар суҳбат чоғида «билмасдан адашган»ликларини рўнақ қиладилар. Бу баҳоналарнинг ҳақиқатдан узоқлиги равшан, чунки бирортаси ҳам харидор фойдасига «адашмаган».

Харидоргир молларни яшириб қўйиш бўйича тижорат дўкони сотувчиси Оқилжон Бобожонов туманда рекорд ўрнатди. Дўкон омбори кўздан кечирилганда, 2 минг 375 сўмлик ноёб моллар — аёлларнинг чет элда тайёрланган этикларни, камзуллари ва плашлари топилди.

Текшириш жараёнида фош этилган қондабузарлар қилмиши ҳужжатлаштирилиб, халқ судига оширилди. Бу билан адолат тантана қилди, деб мағрурлана олмаимиз. Нега деганда, ҳали бундай қаллобларнинг маслақдошлари кам эмас. Уларга қарши кенг жамоатчилик кураш олиб бориши керак. Шундагина янги иқтисодий шароитдаги муаммолар ўз ечинини топади. **Ғафур ДАВЛАТОВ.**

Хива тумани ва шаҳри ИИБ БХСС катта оператив вақили милиция лейтенанти.

ТЕХНИКА КЎРИГИ ДАВОМ ЭТМОҚДА



Тошкент шаҳар ИИБ ДАНБ диагностика бекати шу йилнинг 5 ойи мобайнида 20.020 та транспортни кўриқдан ўтказди. Уларнинг 11.238 таси шахсий, 1403 таси давлат транспортдир.

Режалаштирилган тадбирлар натижасида техник кўриқдан ўтганлиги ҳақида 5 та сохта муҳр, двигател ва кузов рақамларининг ўзгартирилганининг 9 та факти аниқланиб, ҳужжатлар ЖКБга топширилди.

Чилонзор, Куйбишев, Киров туманларида кўриқдан ўтмаган шахсий автомобилларни аниқлаш мақсадида қисман ҳовлиларда ҳам текширишлар ўтказилди.

580 дан ошиқ ҳайдовчи ўз автомашинаси ойналарини давлат ўлчамида кўрсатилган талабдан ортиқ даражада қорайтиргани учун оголанти-

рилди. Бу ишлар билан шуғулланувчи «Тюльпан», «Тон» ширкатларининг раисларига расмий эслатмалар тақдим этилди.

Даврон УМАРОВ,
Тошкент шаҳар ИИБ ДАНБ диагностика бекати бошлиғи милиция майори.

СУРАТЛАРДА: 1. Техник оператор Т. Павлова ҳайдовчиларнинг ҳужжатларини рўйхатга олмақда.

2. Бекатнинг ходими милиция лейтенанти Э. Ҳожиматов шахсий автомобилани кўриқдан ўтказмоқда.

3. Милиция капитани Ҳ. Умаров (ўртада) кўриқдан ўтган автомашина техник паспортларига махсус муҳр қўймоқда.

Боқижон ХОЛМИРЗАЕВ олган суратлар.

Ҳозирги кунда жиноятчилик ортаётир. Бу ҳақда гап кетса, айримлар айбни милицияга, суд, прокуратурага, баъзилар қонуннинг бўшлиғига тақайди. Яна кимлардир тўқликка-шўхлик, дейди.

Менимча, бу гаплар у қадар тўғри эмас. Милиция, суд, прокуратура ходимлари зарур техник жиҳозларга эга эмаслар, бу — тўғри. Қонунларимиз эса рисоладагидай. Тўқлик ҳақида айтиш кераки, кимдир тўқ, кўпчилик эса, аксинча. Мана шу «аксинча»лик эмасмики жиноятга бошлаётган! Келинг, биргалашиб фикр юритайлик. Кўпчилик тўқ эмасми, балки ҳам моддий, ҳам маънавий қашшоқмиз. Ишонмасангиз, дўконга боринг, мактабга тарбия муассасалари ва мактабларни айланинг. Дўконлар аҳволи маълум. Хўш, тарбия масканлари-чи? Фарзандларимиз қатнайдиган бу даргоҳларнинг ночорлиги, тарбиянинг носозлиги ёлғонми? Жиноятнинг илдизи айнан шу жойларда эмасмики? Энди далилларга мурожаат қилайлик. Тошкент шаҳрида 1988 йили вояга етмаганлар томонидан 1086 та, 1989 йили 1285 та, 1990 йили эса 1914 та жиноят содир этилган. Шунинг 354 таси мактаб ўқувчилари ҳиссасига тўғри келади. Тошкент шаҳрида 302 та ўрта мактаб бўлиб, жиноятчи ўқув-

ЖИНОЯТЧИЛИК КЎПАЙМОҚДА:

НЕГА?

чилар сони мактаблар сонидан ортиқ экан. Бу ерда изоҳга ҳожат йўқдир. Хўш, нега жиноятчилик ўсмирларни ўз қомига тортмоқда? Менинг суҳбатдошим, меҳнат-тарбия муассасаси ходими ички хизмат катта лейтенанти С. Полухин шундай жавоб қилди:

— Балоғатга етмаган ёшлар ўртасидаги жиноятчиликнинг асосий сабаблари: кемтик (отасиз ё онасиз ўсиш, ота ёки она ароқхўр, маънавий бузук) оила муҳити, ёлғиз оналар берган «тарбия», мактаблардаги таълим-тарбиянинг ёмон йўлга қўйилиши (маънавий қашшоқлик — Д. С.), иқтисодий қашшоқлик ва ахлоқ-одоб қоидаларига тўғри келмайдиган видеофильмлар.

Маъмур муассаса оғир жиноят: қотиллик, қароқчилик, номусга тажовуз қилган жиноятчилар учун мўлжалланган. Мен яна сўрадим:

— 1989 йилга нисбатан бу ердаги қамалганлар сони 1990 йилда кўпайдими, камайдими?

— Бу ерда 1989 йилда тахминан 360 нафар жиноятчи ёшлар бўлган, 1990 йилда уларнинг сони 400 нафарга етди.

Қарийб ўн икки фоизга ортган. Шунингдек, 1990 йили 127 нафар озодликка чиққанлардан 8-10 фоизи такрор жиноятга қўл урган. Сабаб?

Биздагиларнинг кўпчилиги болалар уйида тарбияланишган. Бу ердан озод бўлгач, борадиган муқим яшаш ва иш жойлари йўқ. Жойлардаги мутасаддилар эса қамондан чиққан одамга қандай қарашлари сир эмас.

Яна мактаблар масаласига қайтсак, ўсмирнинг жиноятчи, қизларнинг фоҳиша бўлиб кетишига мактабнинг нима даҳли бор? Жуда бор-да! Дейлик, ўқувчи фанлардан ўртача ўзлаштиради, аммо тўлиқ ўрта маълумот олишни истайди. Бироқ мактаб маъмурияти туман халқ таълими бўлиминдан берилган «планга кўра ўқувчини мажбурлаб «Хўнар-техника билми юртига» жўнатади. Ўқувчи эса, ўзи хоҳламаган жойда ўзи истаманган касбни эгаллашдан воз кечиб, кўна тентираб, кунини ўтказди ва кўпинча маънавий бузук гуруҳларга қўшилиб қолади. Бу — исбот талаб қилмайдиган ҳақиқат! Афсуски, режали тарзда ўқувчиларни мактабдан «бадарағ қилиш» ҳамон давом этмоқда. Бу эса ўз ўрнида жиноятчиликнинг ўсишига сабаб бўлаётир. Энди яна бир ҳақиқат мавжудки, буни халқ таълимидаги мутасаддилар сиратан олгилари келмайди. Чер-

Ўсмир ва қонун

ненко даврида мактаб ўқитувчиларининг дарс соатлари қисқартирилиб, маошлари оширилганди. Масалан, бошланғич таълимда бир ҳафталик дарс ҳажми 24 соатдан 20 соатга камайрилди, маош эса 80 сўмдан 140 сўмга етказилди. Юқори синф ўқитувчиси эса 18 соатлик дарс учун 100 сўм ўрнига 130 сўм оладиган бўлди. Аммо негадир таълим-тарбия самарадорлиги ошмади. Негаки, авваллари 80 сўм учун жон койитишни истамай бошқа мўмайроқ соҳада ишлаётган ўқитувчилар ўзларини мактабга «урдилар». 1990 йили Президентимиз И. Каримов мактаб ўқитувчиларига қўшимча имтиёзлар белгилловчи, улар маошини оширувчи Фармон чиқарди. Хўш, олдинги Фармондаги ҳол энди ҳам юз бермаётганига ким кафил бўла олади? Ўқитувчилик маълумоти билан дўконда сотувчилик ёки икки-та жойда фаррошлик қилган, ё уйда ўтириб у-бу сотиб, тирикчилик қилган одамни мактабга келиб болаларга таълим-тарбия беришини бир кўз олдингизга келтиринг!

Тўғри, ҳозир виждон эркинлигига кенг йўл очилди. Мактабларда эски ўзбек ёзуви, «Одобнома» дарслари белги-

Ҳатто сал «безорироқ» ўқувчининг олдида бўйини сиқиб турадиган ўқитувчилар анчагина. Балки бу гапларим учун халқ таълимидаги мутасаддилар ранжишар. Мен ҳар бир гапим учун уларга исбот кўрсатишга доимо тайёроман.

Ўсмирлар ўртасида жиноятчиликнинг ўсиши — бу «МАКТАБ-ОИЛА-ҲУҚУҚ-ТАРТИБОТ ХОДИМЛАРИ»нинг ўзаро муносабатлари талаб даражасида эмаслигига далилдер.

Шунингдек, айрим қонунларимиз борки, гоҳо жиноятчиликнинг ўсишига сабаб бўлиб қолади. Масалан, ёлғиз оналар ҳуқуқини белгилловчи, уларни муҳофиза қилувчи, уларга имтиёзлар берувчи қонун. Аввало «ёлғиз она» иборасини қўллашнинг ўзини аёлларимиз учун ҳақоратдир. Аммо ёлғиз оналар учун ғамхўрлик қилувчи қонун покдомон, заҳматқаш, муштипар аёлларни камситиб қўйган. Беш-олти нафар қонуний никоҳдан туғилган гўдагини ўстирган аёл бир нафар никоҳсиз фарзанд ўстирган онадан кўра имтиёзсизроқ: тиббий хизмат, уй-жой олиш, касаллик варақаси олишда бу нарса, айниқса, яққол кўзга кўринадир. Тўғри, гўдакда айб йўқ. Аммо қонуний фарзанд кўр-

ган аёлнинг айби — никоҳдан ўтганими? Ёлғиз она «тарбияси» туфайли жиноятга қўл урган болалар озми? Бу борада мен С. Полухиннинг фикрига тўла қўшилишаман!

Таълим-тарбия масканларидаги аҳволни бош йўналиши қилиб олдик. Бу бежиз эмас. Ўқитувчининг вазифаси — ёш авлодга таълим жараёнида тарбия ҳам бериш. Аммо айрим мактабларда ўқитувчилар ўз вазифасини сунистеъмом қилмоқдалар. Фрунзе туманидаги бир мактабда директорчи пенсияга чиқариш (кузга эмас!) маросимига ўқувчилардан бир сўмдан пул йиғиб совға олинган. Айнан шу мактабда бола бошланғич таълими тугатиб, 4-синфга ўтаётгани учун синфxonани таъмирлашга 5 сўмдан, ўқитувчига атлас мато олиш учун 3 сўмдан пул йиғилмоқда. Эски вақтларда «Ҳафтиякни тугатган ўқувчи домлага ё отинибуга назир берган экан. Нима бу — таъмирликми? Ёки тарихга қайтишим? Учунчи синф боласи саккиз сўмни қаёқдан олади? Ота-онаси бермаса-чи? Уғирлик қилади. Чунки ҳамма олиб келяпти, у ҳам топиши керак! Билиб-билмай, гоҳо ўз нафси йўлида болани жиноятга йўллаётган ўқитувчилар бир ўйлаб кўрсалар бўлар эди.

СПИД, юрак хасталиги, ошқозон касаллигини XX аср касалликлари, дейишади. Мен бунга яна бир хасталик — ЛОҚАЙДЛИК иллатини қўшган бўлар эдим.

Қадимдан: «Дўстингдан кўрқма, нари борса, у хиёнат қилади, душманингдан кўрқма, нари борса, у ўлдирди. Лоқайд кимсадан кўрқ. Лоқайдлар хиёнат қилмайди, ўлдирмайди, уларнинг лоқайдлиги туфайли ер юзиде ХИЁНАТ ва ҚОТИЛЛИК мавжуддир», — деган ҳикмат бор. Афсуски, лоқайд кимсага жазо йўқ, афсус!..

Ўсмирлар ўртасидаги жиноятчиликни камайитириш учун ички ишлар ходимлари, оналар кўмиталари, халқ таълими мутасаддилари доимий ва мустаҳкам алоқа ўрнатишлари зарур. Бу борада ягона битим тузиш фойдадан ҳоли бўлмасди, деб ҳисоблайман. Бу тақлифга ички ишлар бўлиминдаги раҳбарлар нима дер эканлар?

Дилмурод САИДОВ,
журналист.

ТАҲРИРИЯТДАН: муаллиф ўткир муаммони қаламга олган. Уялаймики, мақола ҳуқуқ-тартибот идоралари ходимлари, муаллимлар ва бошқа

рўзномасеварларда қизиқиш ўйғотади. Билдирилган фикр-мулоҳазалар эса рўзномада чоп этиб борилади.

АЛВАСТИ

Жиззах вилояти қарлар жамиятида ишчилик қилаётган Наима бирдан ўзгарди-қолди. Гўёки унга ҳамма ўғирлигу талончилик билан бойлик орттираётгандек туюлаверди. Емонга яхши қапишмас, деганларидек ўз укаси Баҳодирга маслаҳат солди. Емон гап қулоққа яқин бўлар экан, Фаҳриддин, Улуғбек, Тоҳирларга ҳам бу ният хуш келди.

Улар Наиманинг ногорасига ўйнаб, охири нима билан тугашини ўйлаб ҳам кўришмади. Аёлниги ўртага ташлаган макрли режаси уларнинг батамом жазосиз қолишига кафилилик бераётгандек эди.

Шу тариқа улар бирлашиб, 1990 йилнинг 9 нояб-рида тунги соат 24 ларга яқин шаҳар драма театри майдонида йиғилишди. Омад чоғинини қарангки, уларнинг қурбонлари ўз оёқлари билан юриб келишди. Тўдага таниш йигитлар Вали Т. ва Зиёд У.лар яқинлашиб, ҳол-аҳвол сўрашиб туришганди ҳамки, шу даҳада яшовчи Ш. Муқаддас ва А. Гулсаралар кўришишди. Фаҳриддин Гулсаранинг қўлидан чангаллаганча хилватга судрай бошлади. Гулсаранинг қулоқларидаги тилла зиракларни назардан қочирмаган Наима укаси Баҳодир билан Улуғбекни уларнинг ортидан зипиллатди.

Фаҳриддин билан Гулсарани шу ерда қолдиришди. Зиёд, Баҳодир, Валилар ёрдамида эса Муқаддасни олиб, Учтепа қўрғонда яшовчи К. Эрматованинг уйига келишди. У ерда кал-

такланган Муқаддасни қияланғоч ўйнашга мажбур этиб, то шўрлик қизнинг рақсини ҳузур билан томоша қилгунча Фаҳриддин ҳам сўкина-сўкина ҳозир нозир бўлди.

— Нима бало эплай олмадингми, — заҳархандалик билан сўради Наима.

— Э, бошқача йўлни тутдим, — деди у хохолаб куларкан.

Шерикларига бу гап жуда ёқиб тушди шекилли, уларнинг кўзлари ваҳшиёна чақнади.

— Сен бизларни ментларга сотасанми-а?

Наима бирдан яланғоч қизни ура бошлади.

— Фаҳриддин, ушла бунни.

У шундай деб қўлига қайчи олди. Фаҳриддин иккаласи эчкининг жунини олгандай, унинг сочларини қиртишлаб ташлашди.

— Сочимни ўзим олдим, деб бизга қоғоз ёзиб бе-

расан.

Тусунтириш хатини ўз онаси Қумри Жўраевага ҳар эҳтимолга қарши бериб қўйди.

Аёл қиёфасига кирган ҳайвоннинг йиртқичлиги бу билан тугамади. Одамларга азоб бериб, роҳатланишнинг янги усулларини ўйлай бошлади.

7 декабрь куни Фаҳриддин, Тоҳирларни олиб, яқин ўзи яшаётган Р. В.нинг хонадонига йўл солди. Йўл-йўлакай Тоҳир уйига кириб, қирқма милтиқ, қўлбола тўппонча, заҳарли газ, ниқоблар ва бошқа қуролларни қора чарм сумкасига жойлаб чиқди.

Аёл кишининг майин овозига эшик очган В.ни икки йигит дарров деворга қапиштириб қўйди. Пул ва қимматбаҳо буюмларини қўш-қўллаб тутқазмаётганидан газабланган Наима жабрдийданинг икки ярим яшар Кристинасини гаровга олди.

— Боланг ширин бўлса, топасан.

Мунчоқдек кўзларида даҳшат қотган фарзандини алвасти қўлида кўрган онанинг тили айланмай қолди. Бундан ўзича ҳузурланган Наима эса унинг 1113 сўмлик зираги, минг сўмлик узугини ечиб олиб, уйни



тинув қилишга киришди. Қўлга илинган нарсаларни ўзиникига айлантира бошлади.

Йўлда бир жуфт тилла зиракни улуш тарзида Тоҳирга берди.

ИИБ ходимларига бу жиноятлар ҳақида маълумотлар тушгани ҳамон жинорий гуруҳни қидириш ишларини бошлаб юборишди. Улар содир этган жиноятлар бошқа жиноятлардан тубдан фарқ қиларди. Тўданинг фаолияти шифқатсизлиги ва қурбонларини таққирлаши билан ажралиб турарди.

Кўп ўтмай тошбағир хотин бошчилигидаги босқинчилар тўдаси қўлга олинди.

Ўтган йилнинг 10 декаб-рида қўзғатилган жинорий ишга шу йилнинг 7 майда яқун ясалди.

А. БОЗОРБОВ, милиция майори.

ЭГРИ ИШ — КЕЛТИРАР ТАШВИШ

Бола тарбиясини уддалай олмаган ота-онанинг ҳолига вой. Айниқса, фарзанд ёшлигидан эрка ўсиб, пулга ўч бўлди, шўрим қуриди, деяверинг. Чунки у охир-оқибат юзингизни ерга қаратади. Ҳар жойда бўлганидек, Тошкент шаҳрида ҳам бундай ёшлар учраб туради. Улар текин пул топиш мақсадида тез-тез одамлар гавжум бўлган жойларда — шаҳар улови, бозор ва дўконларида пайдо бўлишади. Яъни, «ов»га чиқишади.

Автобусда одамлар тирбанд. Ҳаттоки оёқ қўйишга жой йўқ. Шу пайт кўзлари бежо бир ўспириннинг ҳатти-ҳаракатлари фуқаро кийимида хизмат вазифаларини бажариб юрган ходимларда шубҳа уйғотди. Йигитча жўрттага у ёқдан бу ёққа одим ташлаб, одамларнинг қўлидаги буюмларга кўз олайтирарди. Уни зимдан кузатиш бошланди. Қулай пайтдан фойдаланиб эндигина бир аёлниги сумкасига қўл солган эди, қутилмаганда икки милиционер автобуста чиқиб қолди. Йигит ёғли ўлжадан воз кечишга мажбур бўлди. Кейинги бекатда эса автобусдан тушиб, бош кўпмолли дўконга қараб йўл олди. Ал-

Киссавур изидан

батта, уни кузатиб келаётган ходимлар ҳам «ҳамроҳ»ликни давом эттиравердилар. Дўконга кираверишда бир аёл йигитнинг назарига тушди. Ташқи кўринишидан содда ва пулдор кўринган жувон чамаси ўзига маъқул бўлган буюмни қидирар эди. У одамлар уймаланишиб турган пештахта олдида тўхтади-да, амаллаб улар орасига кириб олди. Йигит ҳам унинг орқасидан қолмади. Ниҳоят қулай вақт келди. Киссавур бир бор атрофни «разведка» қилиб олди. Ҳамма ўзи билан овра. Кейин эса аста қўлини аёл ушлаб турган сумкага суқди-да, ҳамёнини ўмариб ўзининг чўнтагига солди...

Аттанг, ҳали балоғат ёшига ҳам етмаган йигитча шу лаҳзанинг ўзида ҳаётига бир умрлик доғ туширди. Яна ўз ихтиёри билан-а.

Ҳамёнда 51 сўм пул бор экан. Уни оператив ходимлар ўз эгасига қайтариб берганларида, аёл ҳайратдан ёқа ўшлади. Ўғирлик ҳолати расмийлаштирилди. Киссавурнинг шахси ҳам аниқланди. У Тошкент шаҳридаги Самарқанд дарбоза кўчаси Ҳуррият йўлининг 83-хонадонда истиқомат қилувчи, 1974 йилда туғилган Илҳом Усмонов экан. Унга нисбатан ЎзССЖ жиноят мажмуаси 125-моддасининг 2-қисми билан жинорий иш қўзғатилди. Яқинда эса бу текин пул шайдо-сининг ҳатти-ҳаракатлари Октябрь тумани халқ судида кўриб чиқилди ва унга нисбатан уч йил муддатга озодликдан маҳрум этиш жазоси белгиланди. Бироқ Илҳомнинг ёшлиги ҳисобга олиниб, ҳукм икроси икки йилга кечиктирилди. Шу вақт ичида ҳулқини тузатса, жамият унинг гуноҳидан ўтиши мумкин.

Х. МУЙДИНОВ.

Халқ мулкисини сақлаямиз

Шу кунларда жамиятимизнинг ҳамма жойларида иқтисодий тақчиллик сабабли милиция ходимларининг хушёрлигини анча оширишга тўғри келаяпти. Чунки тағлиқ оқибатида майда ўғирлик, олиб сотарлик каби жиноятлар ҳам анча кўпаймоқда. Бу каби қонунбузарлик билан соқчилик бўлимининг ходимлари ҳам қаттиқ кураш олиб бормоқдалар.

Урганч тумани ИИБ қошидаги кўриқлаш бўлимининг бошлиғи милиция капитани Бахтиёр Раҳимов билан жамоатчи мухбиримизнинг суҳбати ана шу ҳақидадир.



— Бўлимимизда асосан фуқаролар ишлайдилар, тўғриси соқчилик қилдилар. Милиция маршрутлари эса ҳозирча йўқ. Туманимиз марказидаги барча объектлар маркашланган соқчилик пультага уланган. Бу ерда операторлар навбатчилик қилишади. Шунингдек, марказий пультага уланмаган бошқа корхона ва ташкилотларни ҳам кўриқлаймиз. Шундай бўлсада, баъзан қонунбузарлар ҳам учраб турмоқда. Ходимларимиз уларни ўз вақтида аниқлаб, ўғирликнинг олдини олишда яхши хизмат қилмоқдалар.

— Аниқроқ қилиб айтсангиз?

— Масалан, 1-паррандачилик фабрикасининг иш-

чиси, 1953 йилда туғилган Бибиражаб Абдуллаева шу йилнинг 10 май куни соат 23 ларда иш жойидан 60 донна тухумни ўғирлаб олиб чиқаётганида ходимларимиз томонидан ушланиб, ички ишлар бўлимига олиб келинди. Халқ суди унинг бу қилмиши учун 50 сўм жарима солди. Шунингдек, гўшт комбинатининг ишчиси, КПСС аъзоси Раҳимбой Оллабергановни олайлик. У ҳам ишдан кейин 19 март куни соат 17 ларда 5 килограмм гўштни олиб чиқиб кетаётганида ушланди. Еки яна бошқа мисолни олайлик. 26 март куни 2-паррандачилик фабрикаси-дан шу ерда ишловчи Отабой Болтаев 3 килограмм товуқ гўштини ўғирлаб чиқаётганида тўхтатилди.

Туман халқ суди бу иккала ташмачига ҳам 100 сўмдан жарима солди. Бундай мисолларни кўплаб келтиришим мумкин.

— Бу каби ўғирликларнинг сабаби нимада деб ўйлайсиз?

— Менимча бунинг асосий сабабларидан бири, бу идораларнинг қоровуллари ўзлариникидир. Улар эса таниш-билишчиликка йўл қўядилар. Шунинг учун кўпинча юқоридаги ҳоллар учрамоқда.

— Энди ўрнак кўрсатиб ишлаётган ходимларингиз ҳақида айтиб ўтсангиз?

— Ходимларимиздан соқчилик бўлими участка бошлиқлари Ибодулла Холлиев, Жумабой Абдуллаев, оператор Саъдулла Сатипов ва катта инспектор ми-

лиция катта лейтенанти Қадамбой Оллабергановларни айтиш мумкин.

Қисқаси, бизнинг асосий вазифамиз бўлган халқ мулкисини сақлашни иложига борича сергак турган ҳолда бажараямиз.

СУРАТЛАРДА: Урганч тумани ИИБга қарашли соқчилик бўлимининг бошлиғи милиция капитани Б. Раҳимов; навбатчи оператор С. Сатипов ва кўриқлаш бўлими катта инспектори милиция катта лейтенанти Қ. Оллабергановлар навбатдаги объектни қабул қилганликлари ҳақида хабар бермоқдалар.

Суҳбатдош Саъдулла БОБОВ. Муаллиф олган суратлар.

Мухаррир

Зокир ОТАЕВ.

МАНЗИЛГОҲИМИЗ: 700029, Тошкент, Лопатин кўчаси, 1.

Ўзбекистон Компартияси Марказий Қўмитаси нашриятининг Меҳнат Қизил Байроқ орденли босмахонаси, 700083, Тошкент, Ленинград кўчаси, 32.

Телефонлар: Мухаррир,

муҳаррир ўринбосари — 39-77-23, 37-23, 46-56 (ички).

«ПОСТДА» — («НА ПОСТУ»)

Орган коллегияси МВД ЎзССР